

## SAGARDOA-RI

Ureztuba ikusten  
zaio koloria,  
balsamu bat da berriz  
bere savoria;  
chinpartak darizkala  
edari guria,  
penak iltzeko chanpain  
bañan da obia.

Kentzen du egarriya  
alaitzen du oso,  
jartzen daki kantari  
dantzan ta garboso;  
urrezko edariya  
edaten da gozo,  
bañan ukalondorik  
ez geiegi jaso.

Bere gayan neurriya  
dionari artzen,  
umore ona baizik  
ez dio ekartzen;  
baña geiegi tripan  
preso badu sartzen,  
tripazaya balantzak  
egñaz du jartzen.

¡O! edari maitea,  
¡o! edari ona,  
kulpikan gabe preso  
kupelan egona;  
orain libratzen zera  
gure zoriona,  
atoz, pozturik deika  
daukazu gizona.

Chochetik irten zera  
kristal fiñ garbira,  
saltatu dezu illun  
betikan argira;  
atoz ederra, atoz  
gauzkatzu begira,  
eragiteko baso  
zaudenari jira.

Zu zera lorientzat  
intza dan modura,  
gizonaren pozgarri  
sortuba mundura,  
edaten zaitubena  
zu zeruko ura,  
igotzen dezu mundu  
ontako zerura.

RAMON ARTOLA.

(Del *T̄un-t̄un*)